

DIREKTE EN INDIREKTE REDE

Direkte rede

Die direkte rede verwys na die **presiese** woorde wat iemand sê of gesê het.

Gebruik die regte puntuasie wanneer jy 'n sin in die direkte rede moet skryf:

- dubbele aanhalingstekens
- dubbelpunt (nie 'n komma nie) voor iemand se direkte woorde
- die eerste letter van die aangehaalde woorde word met 'n hoofletter geskryf
- komma na of voor die naam van die aangesprokene

Voorbeeld: Die onderwyser vra: "Het jy jou huiswerk gedoen, Lisa?"

Indirekte rede

Ons maak gebruik van die indirekte rede om **ander mense se woorde** oor te vertel, byvoorbeeld:

1. Stellings

Sue het gesê: "Ons het Saterdagmiddag gaan ysskaats."

Sue het gesê dat hulle Saterdagmiddag gaan ysskaats het.

Dit is nie altyd nodig om dat te gebruik nie, byvoorbeeld:

Brendon het gesê: "Sit sommer die boeke op die tafel neer."

Brendon het gesê hulle kan sommer die boeke op die tafel neersit.

2. Vrae

Sunette vra: "Was die koek lekker, André?"

Sunette vra vir André of die koek lekker was.

Jonathan vra: "Gaan julle saamkom?"

Jonathan vra of julle gaan saamkom.

3. Bevele

Mnr. Labuschagne: "Kinders, sit en haal uit julle boeke."

Mnr. Labuschagne beveel die kinders om te sit en hulle boeke uit te haal.



Onthou

In die indirekte rede...

- ★ word woorde soos ek, jy en ons na hy of sy en hulle verander:

ek / jy / ons / julle	hy/sy / hulle
my (potlood) / myne	jou (potlood) / joune
sy/haar (pen) / syne/hare	ons (potlode) / ons s'n
julle (potlode) / julle s'n	hulle (potlode) / hulle s'n

- ★ word tussenwerpsels (uitroepe) se gevoelswaarde omskryf om verbasing, pyn, vreugde, teleurstelling, ens. uit te druk, byvoorbeeld:

"Ag nee, ek kry nie die somme reg nie!" sê Johan.

Johan sê moedeloos / teleurgesteld dat hy nie die somme regkry nie.

- ★ bly die tyd in die sin dieselfde, bv.:

Stephan het gesê: "Ek is bly die eksamen is verby."

Stephan het gesê dat hy bly is die eksamen is verby.

- ★ verander woorde wat tyd en plek aandui as die woorde op 'n ander plek of 'n ander tyd oorvertel word, byvoorbeeld:

Simone het gesê: "Ek het gister hierdie paadjie gedraf."

Simone het gesê dat sy die vorige dag daardie paadjie gedraf het.

- ☆ Nog woorde wat in die indirek verander:

vandag	daardie dag
vanoggend, ens.	daardie oggend / middag / aand / jaar
gister	die vorige dag
môre	die volgende dag
eergister	twee dae tevore
oormôre	twee dae later
volgende jaar / week	die volgende jaar / week
verlede jaar / week	die vorige jaar / week
gelede	tevore
nou	toe
hierdie	daardie
hier	daar
hierheen / hiernatoe	daarheen / daarnatoe
kom	gaan